

تاریخ عثمانی انجمنی

مجموعه سی

ایکی آیدہ برنشر اولتور

مندرجات

منظوم بر سفارتنامہ عبدالرحمن شرف
علمدار مصطفی پاشا (مابعد) افضل الدین
دکترلی (لادیق) امارتی احمد توحید
اوچنجی سلطان مرادک انکلتہ قرالیچہ سی الزابتہ برنامہ سی صفوت
قرہ مان اوغللری حقندہ و ثائق محکوکہ (مابعد) خلیل ادہم
سیسام بکلری احمد توحید
تفرقہ : قانوننامہ آل عثمان عارف
تاریخ سلطان محمد خان ثانی بہ عائد مجاہد فہرست

فیثانی ہ غروش

مرجی — باب عالی تاریخ عثمانی انجمنی

استانبول

انجمن عثمانی

طبعہ مطبعہ عثمانیہ

۱۳۳۰

قرامان اوغلاری حقنده و نائق محکومه

(۱۲ نوسرولی جزؤدن مابعد)

« علی بن قرمان » نامنه مضروب فقط محل ضربی مشکوک اولان برکوش سکه نك تاريخی يوق ايسه ده بزجه بوعلی بکه اسناد ايديله بيلور . بوسکه نك وجهنده کوريلن « السلطان » کلهسی بلکه علی بکک مصر سلطاننه اولان تابعيتی ایما ایچون درج اولمشدر [۱] .

شکاری تاريخنده قرامان اوغلی علاءالدین بکک سلطان مراد اول کریمه سنک غیری اولان برزوجه سندن علی اسمنده بر اوغلی اولدینی وولایاتی اولاد واقرباسی بیننده تقسیم ایتدیکنده نیکده بی مذکور علی بکه ویردیکی وبرمدت صکره بونلری بجایش ایتدیکی حاله علی بکی نیکده ده اها ایلدیکی مندر جدر . عثمانلی تاریخلر ننده ده علی بکک ۷۹۳ ده وقوع بولان آق چای محاربه سنده برادری محمد بک ايله برابر عثمانلیر طرفندن اسیر ایدیلرک بروسه ده حبس ایدیلدیکی محرردر [۲] . اگر

[۱] توحيد بک موزه قتالوغنده (نوسرو ۷۶۴) بوسکه نك محل ضربی (قونی) اوله رقی او قوبوب یخشی بکک اوغلی علی بکه (یعنی علاءالدین خلیل بکه) اسناد ایتک اسنه بور . مع مافیه خلیل بکک اوغلنک کتابه لرند دائماً (علاءالدین) یازیلی اولدیغنه باقیلورسه بو اسناد ده اندقیقه شایاندر . قونی ده ودها سائر محالرده سلجوقیلر زمانندن قالمه بعض کتابه لرک بالاسنده دخی (السلطان) کلهسی موضوعدر . — ارمناک قائمقامی اسفندیار زاده فوزی بکک موزه هامونه اهد ایلدیکی بعض مهم قرامان مسکوکاتی میاننده بولان تاریخ و محل ضربی سیلک برکوش سکه نك بریوزنده « السلطان الملك الاشرف علی » یازیلی اولوب بوسکه نك بر عینی دخی برلین موزه سنده موجوددر (وان برخک بالاده مذکور اثرینک ۱۳۲ نجی صحیفه سنه مراجعت) . شکلا اناطولی طوائف ملوک مسکوکاتندن اولدینی اکلاشیلان بوسکه نك قرامان اوغلی علی بکه عطف ایدیلسی ایچون اوزرنده تاریخ و محل ضربی اولان برنسخه سنک بولمنسه وابسته در .

[۲] انشری ، بالاده مذکور نسخه ده . ورق ۹۱ — خیر الله افندی ، جلد ۵ ،

صحیفه ۴۲ ... هاسر ، جلد ۱ . صحیفه ۳۰۸

بر روایت صحیح ایسه محمد بك ايله برابر علی بكك دخی ۸۰۵ ده تیمورلنك
 طرفندن اطلاق اولندیغی ظن ایديله ییلور . علی بكك کتابه لری هپ
 نیکده ده بولندیغنه نظراً برادری محمد بكك تخته جلوسنی متعاقب کندوسنه
 ینه نیکده یی ویرمش اولسی اغلب احتمالدر . هر حالده ۱۲ نومرولی
 آق مدرسه کتابه سنك محتویاتی نظر دفته آلتورسه بوا یکی قرنداشك
 مناسباتی ۸۱۲ سنه سنه قدر غایت دوستانه بر صورتده جریان ایتدیکی
 استدلال اولتور . حال بوکه ۸۱۶ تاریخی اولان کتابه ده (نومرو ۱۶)
 علی بك « سلطان » عنواتی آلدیفندن آرتق محمد بكك ارالری بوزولمش
 و علی بك اعلان استقلال ایش اوله جقدر . فی الواقع عرب مؤرخلرینك
 ویردکلی معلومات دخی بونی تأیید ایدیور . محمد بكك ۸۱۸ سنه لرنده
 عثمانلیلر ايله ظهور ایدن محاربه لرینی متعاقب برادری علی بك تظم حال
 ضمننده مصر سلطانن المؤید شیخه مراجعت ایلدیکندن سلطان طرفندن
 بك چوقا کرامه نائل اولمش و حتی ۸۲۱ ده ایفای فریضه حج نیتده
 بولندیغی دخی سلطانه عرض ایشی اوزرینه معززاً یوله چیقاریلش ایدی .
 ۸۲۲ سنه سننده وقوع بولوب محمد بكك اسارتیله نتیجه لن قیصریه
 محاربه سندن صکره علی بكك اولاً نیکده یه و صکره تکمیل قرامانه مصر
 طرفندن والی نصب اولندیغی و سلطان مؤید نامنه سکه و خطبه ترتیب
 ایتدیردیکنی بالاده سویله مش ایدك . مومی ایه علی بكك مأموریتك
 تصدیقی ضمننده خلعت فاخره کیدیرمك و همده قرامان بلادینی تفتیش
 ایتك اوزره ۸۲۳ سنه سی ربیع الاولنده مصر حکومتی طرفندن اسبغا
 نامنده برامیر برهیئت مخصوصه ايله قرامان مالکینه اعزام اولندیغندن هیئت
 مذکور قرامانك مقرر حکومتی اولان قونیه یه مواصلتلرنده علی بکی قونیه نك
 احمدك تسمیه اولتان قلعه سنن محاصره ایتکده اولدینی حالده بولمشلردر .
 قلعه مذکورده داخلنده قرامان اوغلی محمد بكك اسیراً مصره کیتدیکی
 تاریخندن بری کندی ممالیکندن صقربك بولنوب قونیه شهری ایسه علی بكك

النده اولدینی حالدہ اوتارینچدن بری قلعہ بی آلمغہ موفق اولہ مامش ایدی .
 مصرلی اسنبغا قونیہ یہ داخل اولدقدن صکرہ قلعہ خندقک کنارندہ
 صنقرہ ملاقی اولوب برابر کتورمش اولدینی محمد بکک برمکتوبخی
 کندوسنہ ویرہ رک صنقر طرفدن پک چوق عزت واکرامہ نائل
 اولشدی . مع مافیہ صنقر قلعہ دن چیقمغہ وعلی بککہ صلح ایتکہ قطعاً
 راضی اولدیغندن علی بکک موقعی اول درجہ کوجلشمش ایدی کہ
 اسنبغا عادتاً علی بکی محصور ظن اندیوردی . ایشته بو آراق علی بک
 قونیہ دہ علاء الدین قیبادسلجوقی نک بنا کردہ سی اولان قصردہ [۱] بولان
 مال و ملکینی و مصردن کلن خلعت فاخرہ و اشیای نفیسہ سائرہ بی ترک
 ایدرک بقتہ لارندہ یہ فرار ایتشدیر . بواثنادہ قرامان اوغلی محمد بک
 زاده ابراهیم بک دخی باباسنک بمالکنی الہ ایتک اوزرہ عثمانلیلرک
 یاردمیلہ و عسا کر کافیہ ایلہ قونیہ یہ کلش اولدیغندن مصر ہیئت کندیسیلہ
 مذکور علاء الدین قصرندہ کوروشمش و ابراهیم بکک برچوق ہدیہ سنی
 آلدقدن صکرہ لارندہ یہ متوجہاً حرکت ایدوب اورادہ علی بکک تزدندہ اون
 کون قدر قالہ رق ۸۲۳ سنہ سی رجینک نہایتنہ طوغری قاہرہ یہ عودت
 ایلشدیر .

محمد بکک ۸۲۴ دہ مصردن قرامانہ حین عودتندہ اوغللری ابراهیم
 و علاء الدین بکک عثمانلیلرک معاونتیلہ علی بکی لارندہ دن دخی چیقارد قلدردن
 علی بکک الہ نیکدہ دن بشقہ بریر قالماشدیر [۲] . حال بوکہ محمد بکک
 ۸۲۷ سنہ سندہ انطالیہ دہ اتلاف ایدیلسنی متعاقب علی بک اعلان استقلال
 ایتش اولدیغندن برادر زادہ سی اولان ابراهیم بک ایلہ برادری بینلرندہ
 برسلطنت دعواسی اچیلمشدیر . آنجیق مومی الیہ ابراهیم بک ایلہ برادری
 عیسی بک متفقاً سلطان مراد ثانی یہ مراجعت و دخالت ایتدکلرندن

[۱] بوسرا بک اقامندن اولان علاء الدین کوشکی نامیلہ عالی بر بنا یقین

وقتہ قدر محافظہ اولدینی حالدہ بوندن بر قاج سنہ اول منہدم اولشدیر .

[۲] عینی ، بالادہ مذکور ائردہ ، جلد ۱۹ ، ورق ۲۴۸ و ۲۵۳

پادشاه بوایکی قرن‌داده همشیره لرندن ایکیسنی عقد وعیسی بکه روم ایلنده برسناجاق توجیه ایدوب قرامان حکومتی ده علی بکک الدن بالتخلیص دولت مذکوره نك وارث حقیقیسی اولان ابراهیم بکه ویرمشدر [۱].

ایلروده کوریه جکی وجهله ابراهیم بکک ۸۲۷ تاریخی بر کتابه‌سی موجود اولدیغندن علی بکک مستقلاً حکومتی پک آز بر مدتدن عبارت قالمشدر حتی تکمیل قرامان ممالکی کندوسنی حکمدار اوله رق طانیدیغنه شبهه بیسه ایدیلور. علی بکک نه وقت وفات ایتدیکنه و زهده مدفون بولندیغنه دائر هیچ برویقه‌یه دسترس اوله مدق [۲].

درخواند خاتون بنت بدرالدین

کتابه ۱۸ (سنه ۸۱۳)

توفیت من دار الفروالی دار السرور المرحومة المغفورة السعيدة الشهيدة الرفیعة الستة | سيدة المحدرات فخر النساء والحواتین در خواند خاتون بنت الامیر المرحوم بدرالدین بك نور قبرها | دنیا سرائ منزل دار قرار نیست - بکس نعیم لذت او پایدار نیست اللهم اغفرها وارحها | تاریخها يوم الجمعة ثاني عشر من شهر جمادى الاول سنة ثلث عشر وثمانماية لارنده ده امیر موسی مدرسه‌سی داخلنده کی تربده بر مزار طاشنه محکوک کتابه در. « بدرالدین بك » کله لرندن صکره « بن قرمان » یازیلی دکل ایسه ده قرامان اوغللری تربه‌سند بولندیغنه نظراً بومزارك بو عائله‌یه عائد اولمسی اغلب احتمال در. متن کتابه ده بدرالدین مخلصیه

[۱] تاج التواریخ، جلد ۱، صیفه ۳۳۱

[۲] وایل تاریخ خفا سنده (جلد ۵، صیفه ۱۷۴) مقریزی دن اقتباساً بر قرامان اوغلی علی بکک ۸۲۹ تاریخنده سلطان بر سبایه قارش قریس قرالی یاتوسه یاردم اوله رق ترک‌نلری کوندر دیکنی قید ایدیور. فقط ابراهیم بکک عموجه سنک وبرادرینک وبر اوغلنک اسملری علی اولدیغندن بونک هانکیسی اولدینی تعیین اولنه ماز.

برابر محمود اسمك محرر بولنديغنه رغماً وهله اولی ده متوفیهك اكثریا
مخلصی بدرالدین اولدینی ظن ایدیلن محمودبك کریمهسی اولسی خاطره
کله بیلور . مع مافیه محمود بك تاریخ وفاتی عد اولنان ۷۱۹ سنه سیله
کتابهك تاریخی اولان ۸۱۳ سنه سی اراسنده طقسان دوت سنهك
برفاصله بولنديغنه نظراً بو جهت شایان تأملدر^[۱] . حال بوکه محمود بك
بدرالدین اسملی براوغلی اولدینی حتی ایکی دفعه قرامان تختته جلوس
ایلدیکنی شکاریك روایاته عطفاً بالاده سویله مش ایدك . درخواند
خاتونك اشته بو بدرالدینك کریمهسی اولق احتمالی واردر .

ابراهیم بن محمد

۸۲۷ — ۸۶۸

کتابه ۱۹ (سنه ۸۲۷)

(۱) الملك لله (۲) عمر هذا الحمام في أيام دولة (۳) السلطان ابرهیم بن
محمد (۴) بن علاءالدین بن قرمان خلد الله مملکتته (۵) سنه سبع { آه الموت }
وعشرين وثمانماية — اطرافنده : « هرکه استرعیش بنیاد ایلیه | کله بنده
کوکلی شاد ایلیه | دیلرز بنده کردند خیر ایلیه | حاجی خاصبك اوغلنی
یاد ایلیه »

قونیه قربنده واقع مرام حمامك قبوسنده کی بو کتابه ینه مرامده
بولنوب بالاده ۱۴ نومرو ایله قید اولنان خطیب اوغلنی جامعی کتابه سنك
طرزنده در . او کتابه محمد بك وبو کتابه ایسه ابراهیم بك نامه در .
ترکجه ابیاتده یالکز ایکی کلهك املاسنده براوفق فرق کور بیلور . کتابهك
تاریخنده کی « سبع » کلمه سنك دندانلری بك کوزل آیریش ودرنجی
[۱] وان برخم بالاده مذکور اثرنده ۱۵۷ نومرو ایله بو کتابه دن اله
کچن بك نقصان برقمینی نسر ایدرك بدرالدین اسمندن طولای متوفیهك بدرالدین
محمود بك کریمهسی اولدینغه ذاهب اولمشدر .

دندانك آلتہدہ بر نقطہ وضع ایدیلش اولدیغندن سنہ نك ۸۲۷ اولدیغندہ
شبهه یوقدر .

کتابہ ۲۰ (سنہ ۸۳۰)

(۱) بنی امامہ (؟) هذا المسجد مولانا امیر مجدالدین برہای (؟) بن ...
فی ایام السلطان (۲) ابرہیم بن قرمان لاجل المسجد المنہدم المشہر بقبة
فی شہور سنہ ثلاثین وثمانیۃ
نیکدہدہ قبہ مسجدی قبوسنک بالاسندہ کی موضوعدر .

کتابہ ۲۱ (سنہ ۸۳۵)

(۱) امر بعمارة هذه المقبرة التربة المباركة الشريفة الامير الكبير
ذوالقدر الخطير پیر حسین بك (۲) بن امیر شاہ بك بن طرغوت فی ایام دولة
السلطان الاعظم شاہنشاه المعظم مالک رقاب الامم (۳) سید سلاطین
العرب والعجم سلطان ابرہیم بن محمد بن قرمان خلدالله ملکہ وایدولیہ فی
حجۃ شہر شوال من شہور سنہ خمس وثلاثین وثمانیۃ

قونیہدہ طرغوت اوغلی پیر حسین بك تربہسنگ قبوسی بالاسندہ کی
کتابہدر [۱] . بو تربہنک درونندہ طرغوت اوغلی عائلہسنہ منسوب بر
قاج مزار موجوددر . طورغوت اوغلنک قرامان اوغلی محمد و ابراہیم
بککرك امری تحتندہ اولہرق خدمت ایتدیکنی وحتى عثمانلیلرہ قارشى
دخی بعض محارباتدہ بولندیغنی شکاری بیان ایدیور . طرغوت اوغلرینک
احوالی آروجه تدقیقہ شایاندر .

کتابہ ۲۲ (سنہ ۸۳۶)

(۱) آیت کریمہ (۲) بنی السلطان الافخم والحقان الاعظم مالک

[۱] ہوار ، آپغرافیدہ نومرو ۴۵ ایلہ ولویتوہد . قونیہ نام اثرندہ نومرو
۹۴ ایلہ بو کتابہ بی نشر الہشردر .

رقاب الامم مولی ملوک العرب والعجم واضع مراسم العدل والاحسان (۳) هادم قواعد الجور والظفیان قاتل الزنادقة والمشرکین قاهر الفجرة والملاحدين [ناصر شرع وبشرع اندر زاقبالش نظام ناسخ شرک وبشرک اندر زتیغش اضطراب] [۱] (۴) تاج الدنيا والدين ابرهیم بن المرحوم محمد بن قرمان ضاعف الله اقتداره والى الخیرات ابتداره هذه العمارة المبارکة للصادرين والواردین من اى طایفة کانوا [۱] من المسلمین فی شهر محرم الحرام سنة ست وثلاثین وثمانمئة

لارنده ده ابراهیم بکک انشا کرده سی اولان عمارت مدرسه سنک [۲] قیوسی بالاسنده موضوع کتابه در [۳].

کتابه ۲۳ (سنه ۸۳۶؟)

وقیه

(۱)

(۱) وقف الامیر المعظم (۲) والسultan المکرم ابرهیم بن محمد بن قرمان خلد ملکه (۳) علی مصالح هذه العمارة سبعین اسم وعشرة (۴) اخر من اسم واحد من اصل اثنی عشر سهماً من حمام سکر چشمه [۱] اوجنی سطرک قسم اخیرنی تشکیل ایدوب کوشلی بارانترلرایچنه الثان فارسی عبارده مکتب سلطان لسان فارسی معلی مرحوم ومحترم فیضی افندی طرفندن حل وقرائن اولتمش ایدی .

[۲] آثار نفیسه معماریه دن اولان بوعالی مدرسه ایله اتصالنده کی ابراهیم بک تره سی بوکون غایت خراب وشایان اسف برحاله بولنیور . بوبابده شهبالك ۳۶ نومرولی و ۱۵ مارت ۱۳۲۷ تاریخلی نسخه سنده نشر ایلدیکم مقاله یه باقکیز . بومدرسه سنک برجینی محرابیله اغاجدن مصنوع ایکی قیوقنادی مؤرؤه ایوننده محفوظدر . بوقنادلرده شو کتابه محکوکدر : « عمل الحاج عمر بن الیاس النجار القرمانی » . — ده ویس، بالاده مذکور اثرینک ۲۹۸ نجی صحیفه سنده بومدرسه ایله کتابه سندن بحث ایدیور .

[۳] بوکتابه یی وان برخم بالاده مذکور اثرنده ۱۶۶ نومرو ایله نشر ایلشدر .

الکاین بلارنده (۵) بسيله کوی^[۱] ونصف حمام بانشاء (۶) امام باب السر (۹)
 وجملة حمام چردقلو^[۲] بغازی التي^[۳] (۶) وجملة ارض غفرت^[۴] وجملة
 کرم ولدالحاج علاءالدين مع العمارة فيه ونصف طاحونة (۷) بوبکرله (۹)
 ونصف طاحونة الحاج علی ونصف خان خول چلی وجملة البر لریة (۹)
 وجملة کرم (۸) الحاج یوسف قریب قتی القاضي وجملة کرم خواجه لؤلؤ
 مع العمارة فيه بناحية چقلوچه

(۲)

(۱) ومن جملة اوقاف (۲) العمارة المنقلة التي فيها العمارة وجملة (۳)
 الغرب امامها وجملة الارض بامکسوز^[۵] وجملة ارض سراج علی^[۶] وجملة (۴)
 ارض حافظ مسعود الکایتین بقزله یوک وجملة الارض بوادی فونی (۵)
 قریب التل وجملة قرية افرا ونصف قرية غفريات^[۷] وقزل کلسه وددہ
 کوی^[۸] ارید اوتنه قشلاخی^[۹] (۶) وجملة قرية ویرانلو صالوب^[۱۰] کاینه
 بصحراء قونیہ وجملة قرية قالیک اخور^[۱۱] وقزله کوی^[۱۲] وقیاجق^[۱۳]
 ولریه ویران (۷) وکافر ارنی وبلجک^[۱۴] وچپلاق^[۱۵] ومزرعة اجہ
 وبلجک الاصغر وجملة قرية بالغنده^[۱۶] من قرى بکشهری (۸) وجملة قرية

[۱] علائیه ده در — [۲] «چارداق» آفسرای ونیکده ده وقرامانک سارناول
 جوارنده — [۳] غازیلر قرامانه تابع برکوی — [۴] بلکه غفريات اوله جق
 ۷ نجی نوطه باقکز — [۵] قره پیکار داخلنده — [۶] سراج آفسرای ده
 سراج اوغلی قونیہ اووه سندہ — [۷] الیوم غفريات یاخود قصبه نامیله قرامانه
 تابعدر — [۸] ارکلی ده — [۹] بوژقیرده اوتان قریه سی واردر — [۱۰]
 قونیہ اووه سندہ بویله بریر معلوم دکلد — [۱۱] آفسرای ده وقالاک اخور
 نامیله خادم ده — [۱۲] سلطانیه ده وارکلی ده وسیدی شهرنده بونامده برر
 کوی واردر — [۱۳] سلطانیه ده وبورقیرده وقونیہ نک پیکارباشنه یقین برمحله
 بونامده برر کوی واردر — [۱۴] سللیه ملحق برکویدر — [۱۵] چپلاق
 نامیله سیدی شهرنده وقرامانک الاطاغنده بررکوی معلومدر — [۱۶] بکشهری
 داخلنده بالقنده اسمنده برکوی اولوب قیرایی ناحیه سنه مرپوطدر

عمرانلر^[۱] و حلة قرية اسوبكار و حلة قرية شمس الدين من قري موت^[۲]
وقفاً صحيحاً لازماً

لارنده ده عمارت مدرسه سی دروننده کی ایوانک ایکی طرفنده بولنان
قبولرک اوزرنده (۱ ، صاعده و ۲ ، صولده) مرمر لوحه لره محکوک
اشبو و قفیه نک هر نه قدر تاریخی یوق ایسه ده ۲۲ نومرولی کتابه موجنبجه
مدرسه نک تاریخ انشاسی ۸۳۶ اولدیقندن بو و قفیه نک دخی عین سنه یه
عائد اولسی محتملدر^[۳] .

بو کتابه ده مندرج قرا و مواقع اسلرینک تمامیه تعینی مشکلدر .
نوطه لرده کوستردیکمز مواقعک قسم اعظمی قونیه ولایتی معارف
مدیری فرید بکک اشعاراتنه عطفاً درج ایدیلشدر . طاش اوزرینه
محکوک و قفیه لر اناطولیده اولدجه نادر در . بونلر مملکت مزک جغرافیای
تاریخیسی نقطه نظرندن یک مهم اولدقلرندن طویلانهرق نشر ایدیلله .
لرنده کی فوائد بیاندن وارسته در .

کتابه ۲۴ (سنه ۸۵۴)

هوالمیسر الامال

قد انشاء وانا فحمد الى الله و ثناء الملك الاعظم والمولى المعظم
ظل الله في العالم مفيض بالخير والجلود المنصور بنصره الملك الودود تاج
الدولة والدين السلطان ابراهيم بن محمد بن علاء الدين بن قرمان خلد الله
سلطانه واضح على العالمين برهانه البلدة المعمورة والقلعة الناجية المنصورة
للغزا حصناً ومسكناً هدير في سبيل الله حق جهاده وتمها بعون الله الملك

[۱] ابن اونده عمرانلو ناميله برکوی وارددر — [۲] طاش ایلیده قضا
سراکزی اولوب ایوم موط املاسیله یازیلور .

[۳] وان برخم بالاد . مذکور اثرنده ۱۶۷ نومرو ایله بو کتابه نک
نقصان برصورتی نشر ایتمشدر .

المظیم شا کراً لانعمه اجتنابه و هدیہ الی صراط مستقیم کتب التاریخ
فی شهر شوال المکرم سنۃ اربع وخمسن وثمانمائه

آنامور قضاسی مرکزی اولان چوراق قصبه سنک شرق جنو-
بیسندہ و بش کیلومترو مسافہ دہ ساحل بجرده واقع معموریہ قلعه‌سی
دیوانندہ کی اشبو کتابہ مجموعہ منک ۱ شباط ۱۳۲۷ تاریخلی و ۱۲
نومرولی جزؤنک ۷۷۳ نجی صحیفہ سنده ایزمیت متصرفی محمد تڑت بک
طرفدن نشر اولمشدر . کتابہ مذکورہ نک نہ بر آستامبارینہ نہ دہ بر
فوطوغرافیسنه دسترس اولہ مدیغمزدن بورایہ عینیلہ درج ایدیلشدر [۱] .
کتابہ ۲۵ (سنہ ۸۵۶)

(۱) عمر هذا المسجد فی ایام السلطان ابرھیم بن محمد بن قرمان خلده
(۲) العبد الضعیف الحاج طرسون بن مراد سنۃ ست وخمسن وثمانمائه
نیکدہ دہ خانم جامنک بانجہ سی قیوسنندہ کی کتابہ در . جامعک
برخانم طرفدن تعمیرینہ دائر بنانک قیوسنندہ دہ ۱۰۷۹ تاریخلی بر کتابہ
موجود در .

کتابہ ۲۶ (سنہ ۸۵۸)

(۱) امر بعمارة هذا المسجد المبارک فی ایام (۲) السلطان ابرھیم خلده الله
ملکہ ایاس اغا لسنۃ ثمان وخمسن وثمانمائه

نیکدہ دہ ایاس اغا مسجدینک قیوسی بالاسندہ بر کتابہ در .

کتابہ ۲۷ (سنہ ۸۶۸)

(۱) آمالموت (۲) انتقل من دارالفنا الی دارالبقا (۳) المرحوم المغفور
السعید الشہید (۴) ابرھیم بن محمد بن قرمان سنۃ ثمان وستین وثمانمائه

[۱] مع مافیہ بو مهم کتابہ نک بعض نقطہ لری تدقیقہ محتاج کورینیور .
بو بایدہ آنامور قائمقامی بکہ واقع ولان استرحاماتمرہ شمدی بہ قدر مع التأسف
بر جواب ورود اجمہ بشدر .

لارنده ده عمارت مدرسه سی اتصالنده کی تربیه داخلنده بولنان ابراهیم بکک قبری کتابه سیدر [۱] .

ابراهیم بک نامنه بالاده مندرج طقوز کتابه دن بشقه برده ۸۵۹ تاریخنجه محرر بروقنامه کورولمشدرکه « ابرهیم بیک بن القرمان » عبارلی برطغرا ایله موشحدر ومنتبده « الامیرالکبیر الزاهد مجدالامرا السلطان ابن السلطان سلطان ابرهیم بن محمد بن علاءالدین بن خلیل بن محمود بن قرمان اعز الله انصاره وضاعف اقتداره » جمله لری مندرجدر . بوندن بشقه ابراهیم بکک سکنز نوعده سککسی معلوم اولدیفندن [۲] امیر موحی الیه عائد وئائق عددی اون سکنزه بالغ اوله رق بدایت سلطنتدن تاریخ وفاتی اولان ۸۶۸ سنه سنه قدر برسلسله مکمله تشکیل ایدر [۳] . وئائق مذکورده دن ایکی کتابه ده مخلص اوله رق « تاج الدین » و بر سکده دخی « رکن الدین » یازیلی ایسه ده قبر کتابه سنده اسم ایله برابر هیچ بر مخلص مندرج دکلدرد .

[۱] بوتربده اوچ مرقفد اولوب اورته ده کی ابراهیم بکک وصاغده کی اوغلی قاسم بکک وصولده کی دیگر اوغلی علاءالدین بکک عائددر . آلییدن مصنوع اولوب اوزر لری کونا کون قبارتمه یازیلر ونقوش متنوعه الله مزین اولان لحدومذ کوره نکه اخیراً نصل تخریب ایدیلش اولدیفنی شهبالك ۳۶ نومرولی و ۱۵ مارت ۱۳۲۷ تاریخی نسخه سنده مندرج مقاله مرده . رسلری ایله برابر بیلدیریلشدر .

[۲] توحید بکک ، موزه قتالوغنده نومرو ۷۶۹ - ۷۸۰ ، بومیانده ایکی عدد تاریخنسز سکک دخی واردر . خدیو مصر مرحوم اسماعیل پاشانک حرملرینه عائد برقولکسیون ایچون موسیوقازانووانک نشر ایلدیکی قتالوغده (نومرو ۲۶۳۲ الخ) فاتح سلطان محمد نامنه ابراهیم بکک طرفندن ضرب ایدیریلش اولقی اوزره مقید بولنان سککلر صرف ابراهیم بککدر .

[۳] آقسرائی ده دخی ابراهیم بکک کوزل بر جامی اولوب انجیق قیوسنک کتابه سی یوقدر . قضاء مذکور قائممقامی یحیی سزاقی بکک واقع اولان استرحام اوزره اجرای تدقیقات ایدرک جامع مذکور حولیسنک دیوارنده « ... ابراهیم بن محمد بن قرمان خلد ... » عبارده سیله بر کتابه پارچه سی بولدیفنی وجامعک ابانوز منبری سلجوقیلر زمانندن قاله اولدیفنی اشعار الیشدر .

محمد بکک تاریخ وفاته داتراولان روایاتی انطالیه وقعہ سی طولایسیله بالاده بیان ایتمش ایدک . کندوسنه خلف اولان اوغلی ابراهیم بکک الیمزده بولنان ایلك کتابہ سی ۷۲۷ سنہ سی حاوی اولدیغندن بونی دکشدره جک بشقه واثقک ظہورینہ دکیں سنہ مزبورہ یی مومی الہک مبداء سلطنتی اولق اوزره قبول ایدہ بیلورز [۱] . ابراهیم بکک قرق بر سنہ قدر دوام ایدن حکومتی اثناسندہ دولت عثمانیہ ایلہ مناسباتی مورخار برتفصیل یازمقدہ درلر . بومدت ظرفندہ ابراهیم بکک گاہ پادشاهه اطاعت ایتمش وکاه نقض عہد ایدرک دولت عثمانیہ ایلہ حال حربہ بولنمشدر . فقط کندوسی سلطان مراد خان تانینک برہمشیرہ سیلہ متاہل بولندیغندن محاربہ لرندہ برورطیہ اوغرایہ جغنی حس ایتدجک بوضہریتدن بالاستفادہ حرمی واسطہ سیلہ استشفاع و نزد پادشاهیدہ جلب مرحمت ایتمشدر .

ابراہیم بکک کیفیت وفاتہ داترا مورخار برخیلی تفصیلات ویریورلر [۱] . امیرمرمی الہک برجاریہ دن متولد اکبر اولادی اولان اسحاق بکک زیادہ سیلہ محبتی اولوب تاج و تختی بوکا ترک ایتک استہدیکندن سلطان مراد ثانی ہمشیرہ سندن متولد دیگر اوغللری بوندن مغبر اولہرق صوک درجہ خستہ اولان بابالرینی قونیہ دہ محاصرہ واورادن فرارہ

[۱] منجم باشی جامع الدول وصحایفہ دہ اولاً محمد بکک برادری موسی بکک و بوندن صکرہ ابراهیم بکک تختہ چیقدی دیوب تاریخ جلوس اولہرق ۸۳۲ سنہ سی کوستریورک کتابہ وسکھ لک تاریخلرینہ نظراً بوقول مردوددر . — ابراهیم بکک سنہ جلوسی ایچون وان برخک بالادہ مذکور اثرینہ دخی (صحیفہ ۱۲۸) مراجعت ایدیکرز .

[۲] شکاریہ کورہ ابراهیم بکک کندی اختیاریلہ سلطنتدن فراغت ایدوب ملکنی بیوک اوغلی قاسم بکک وصیت ایتمش ودیکر اولادی حقندہ لطفدہ بولنسی ایچون فاتح سلطان محمد خانہ عریضہ یازمشدر . شکاری ابراهیم بکک کیفیت وفاتی ایچون ایکی روایت کوستریور . بری اجل موعودیلہ وفات دیکری ایسہ استانبول فتحی تبریک ضمنندہ استانبولہ اعزام ایلدیکی وزیر ی احمد پاشا عودتندہ اورادہ کندوسنہ ویریلن زہری اوزوم دانہ سنہ قویہرق ابراهیم بکک یدیردیکندن مسوماً ترک حیات ایتسیدر .

مجبور ایتشدر . ابراهیم بك اوغلی اسحاق ایله برابر قونیه جوارنده کی کواله قلعه سنده [۱] تحصن ایله تخلص جان ایتک استه مش ایسه ده قلعه یه داخل اولور ایکن غلبه ضعفدن طولای ترک حیات ایتشدر [۲] . ابراهیم بك سنه وفاتی ۸۶۸ اولدینی بالاده کی ۲۷ نومرولی قبری کتابه سیله تحقق ایدیور . کتابه مذکوره ده یوم وفاتی محرر دکدر [۳] . عثمانلی تاریخلرینه کوره ابراهیم بك اسحاق دن بشقه پیر احمد وقرمان وقاسم وعلاءالدین و سلیمان ونوره صوفی ناملریله التی اوغلی ده وار ایدی که بونلرک اتیسیده سلطان مراد ثانی همشیره سندن متولد ایدیلر . شکاری ایسه اوغللرینک کافه سی عثمان اوغلی قیزدن متولددر دیور واکبر اولادی اوله رق قاسم بکی کوستروب قرمان و سلیمان ونوره صوفی قید ایتیمور ، فقط بونلرک یرینه خلیل و یعقوب و کوچک مصطفی ناملریله اوچ اوغلی ذکر ایدیور . فی الواقع قرمان بك محمد بك اوغلی اولدینی ایلروده کوریه جکدر . ابراهیم بك وفاتی متعاقب اولاد قرمان یئنده وراثت مسئله سندن طولای منازعات و محاربات باشلامش ودولت قرمانیه ارتق انقراضه طوغری میل ایتشدر .

علاءالدین بن ابراهیم

کتابه ۲۸ (سنه ۸۷۰)

(۱) هوالباقی (۲) انتقل من دارالغرور الی دارالسرور (۳) المرحوم

[۱] کاوله کبی دخی یازیور . عثمانلی تاریخلرینه بك چوق اسمی کچن بومهم قلعه نك موقعی تعیین ایتکه موفق اوله مدق .

[۲] تاج التواریخ ، جلد ۱ ، صفیه ۴۹۸ — منجم باشی ، جامع الدول — صحایف ، جلد ۳ ، صفیه ۲۹ و ۳۸۱ — هامر ، جلد ۳ ، صفیه ۱۱۶ — بومورخلر سنه وفاتی طوغری اوله رق ۸۶۸ تاریخنی کوستریورلر . یالکیز صولاق زاده (صفیه ۲۲۸) ۸۶۷ سنه سنی قید ایتشدر .

[۳] وایل ، تاریخ خلفاده ، جلد ۵ ، صفیه ۳۱۰ ، ابراهیم بك تاریخ وفاتی ۸۶۸ سنه سی سلخ ذی القعدة یاخود غره ذی الحجه اولقی اوزره کوسترشدر .

المغفور السعید الشہید (۴) علاء الدین بن ابرہیم بن قرمان سنہ سبعین
و ثمانیۃ

لا زندہ عمارت مدرسہ سی اتصالندہ کی تربہ نک درونندہ مدفون
ابراہیم بک زادہ علاء الدین بک قبری کتابہ سیدر . عثمانی مورخ لرینہ
نظراً مومی الیہ علاء الدین بک سلطان مراد خان ثانی ہمشیرہ سندن تولد
ایتمشدہ . پدرینک وفاتندن صکرہ برادرلری اراسندہ ظہور ایدن منازلہ
قاریشوب قازیشمدینفہ دائر تاریخلردہ ہیچ برقیدہ تصادف ایدیلہ مدی .
یالکز شکاری ابراہیم بک ہنکام سلطنتدہ علاء الدینہ ایچ ایلی ویردیکنی
سویلیور . تاج التواریخ دہ ۸۷۵ سنہ سی وقایعی صیرہ سندہ علاء الدینک
اولجہ وفات ایتدیکی مندرجدر [۱] .

پیر احمد

کتابہ ۲۹ (سنہ ۸۷۰)

چون نظر کرد رومرا شہزاد	قلعہ قیصریہ کشت آباد
نام وی خان محمد آمدہ است	بادیت سعادتش بغداد
بندہ او بدست پیر احمد	شد تمام این اساس این بنیاد
کر زمن ہجرت بی برسی	ہشتصد سال بود با ہفتاد

قیصریہ دہ ایچ قلعہ نک جنوب طرفندہ کی قپوسی بالاسندہ بولنان
اشبومنظوم کتابہ ۸۷۰ تاریخندہ و فاتح سلطان محمدخان زمانندہ قلعہ نک
پیر احمد بک طرفندن آتمانی حاکمدر [۲] .

ابراہیم بک ۸۶۸ دہ وقوع وفاتی اوزرینہ اسحاق بک باباسنک
تختہ کچمکہ چالشمش ایسہ دہ موفق اولہ مدیقندن پیر احمد بک جالس سلطنت

[۱] جلد ۱ ، صفحہ ۵۱۸

[۲] قیصریہ مجاہس اداره باش کابی سابق نظیف افندی بو کتابہ الہ شہر
مذکورک دہا بز چوق کتابہ لرہی بزہ ارانہ الیش اولدیفندن کندوسنہ بورادہ
عرض شکران ایلرز .

اولمشدر . بوحالدين ممنون قالميان اسحاق بك اوزون حسنه مراجعتله
 كندوسنى قرامانه جلب وقرنداشى پيراحمد قارشى محاربه ايتديرمكه راضى
 ايتمش واوزون حسن ده حقيقه پيراحمدى مغلوب ايدرك اسحاق بكى قونيه
 تختنه اوطورتمش ايسه ده آق قيونليرك اردوسى قرامان ممالكنى صوك درجه
 تخريب ويغما ايتدكدن صكره ملككتلرينه عودت ايتمشدر . اسحاقك
 حكومتى بك آزمدت دوام ايده بيلمشدر ، زيرا فاتح سلطان محمدخان
 انطاليه بكى اولان حمزه بكى پيراحمد امداد ايچون كوندرديكندن
 ارنا كده ورروايتده طاغ بازارنده وقوع بولان مضامده اسحاق بك
 منهرم اوله رق اوزون حسن جانينه فراره مجبور اولمشدر . اشته بصورتله
 ۸۶۹ ده پيراحمد بك تكميل قرامانه مالك اولدينى كې ايچ ايلي دخی
 تحت تصرفه كچورمشدر [۱] . بناً عليه پيراحمدك ابتداء حكومتى تاريخ
 مزبور دن معتبر طو تلى لازم كلور [۲] .

بوموفقيات نتيجه سنده پيراحمدك فاتح سلطان محمد خانه نه درجه مطيع
 ومنتدار اولديغنه بالاده كى ۷۹ نومرولى كتابه نك محتوياتى بر دليل قويدر .
 آنچق ۸۷۱ سنه سنده مومى اليه برهانه ايله دولت عثمانيه قارشى اعلان
 حرب ايلسى اوزرينه اردو ايله كندوسنه مقابله وانهرام كللى به گرفتار
 ايديلمشدر . بودفعه آرتق كواله وقونيه قلعه لرى صورت قطعيه ده عثمانلير
 طرفدن فتح وضبط ايديله رك شهزاده سلطان مصطفى قرامانه والى نصب

[۱] تاج التواريخ ، جلد ۱ ، صفحه ۵۰۰

[۲] تقويم التواريخ دخی بويه جه ۸۶۹ سنه سى يازيليدر - تاج التواريخ ده
 سنه سى محرر دكل ايسه ده سلسله وقايعدن سنه مذكوره اولدينى آكلاشيلور . پير
 احمدك قونيه ده مضروب برسكه سى ۸۷۰ سنه سننددر . بلكه مستقلاً تخته جلوسى
 بوسنه اولق احتماليده واردر . توحيد بك تاريخ جلوسى ۸۶۸ دن اعتبار ايديسور ،
 موزه قتالوغي ، جلد ۴ ، نومرو ۷۸۱ - ۷۸۵ . عين قتالوغيك ۳۷۱ نجى
 صفحه سنده كى ملاحظه به دخی باقكر .

اولمشر [۱]. بومغلوبیتدن صکره پیر احمد لارنده و نیکده طرفلرینه چکیلرک اورادن کاه برادرلریله مجادله‌یه و کاه عثمانلیر ایله محاربه‌یه دوام ایتمشر [۲]. حتی ۸۷۴ ده برادری قاسم بك ایله عقد اتفاق دخی ایتمش اولدیغی آتیده کی ۳۰ نومرولی کتابه دن استدلال اولنور.

پیر احمدك انجمنه کلنجه تاج التواریخ مومی الهك بالآخره اوزون حسنه التجا ایتدیکنی و فقط ینه عودت ایدرک او آراق مستقل بولمسی لازم کلن برادری قاسم بکه ملاقی اولدیغی و قاسم بك کندوسنه سلفکه قلعه‌سنی تکلیف ایتمش ایسه‌ده قبول ایتیب ارمناکه کیتدیکنی و بو اثنا ده کدک احمد پاشایه قارشی برچوق محاربه‌لرده بولدیغی برتفصیل حکایه ایدیور. کدک احمد پاشا ارمناکه کی ضبط ایلدکن صکره دروننده پیر احمدك اولاد و عیالی بولسان مینان قلعه‌سنی [۳] دخی ضبط ایدوب خاندان آل عثمانه انتسابلری جهتیله عائله‌سنی رنجیده ایتمه‌رک قونییه سوق ایتمشر. مینان قلعه‌سنک محاصره ایدیلدیکنی و نهایت تسلیم اولدیغی قارشوسنده کی یوکسک برتپه‌دن رأی العین مشاهده ایدن پیر احمد یأس و تأثرندن انتحار قصدیه کندوسنی صارپ برقیادن آشاغی‌یه آتمش ایسه‌ده هلاک اولیب طرسوسه کیده بیلیمشر. بو وقایعی تاج التواریخ سنه‌سنی کوسترمیه‌رک ضبط ایتمش ایسه‌ده سلسله حکایاتدن ۸۷۹ تاریخی اولق لازم کلور.

خلیل ادهم

[۱] فاتحک ۸۷۱ تاریخی قونییه‌ده مضروب برسه‌کی کورولش اولوب بوباده موزة هایونک مسکوکات عثمانیه قتالوغنک برنجی جلدنده ۱۲۸ نجی صحیفه‌ده کی ملاحظاته بافکز.

[۲] تاریخلرده بو وقایعه دائر معلومات مفصله مندرجدر. از جمله تاج التواریخ، جلد ۱، صحیفه ۵۱۱ — خیرالله افندی، جلد ۸، صحیفه ۱۳۰ الخ. بوراده شهزاده سلطان مصطفی‌ک ۸۷۳ ده فرامانه‌والی نصب اولدیغی محرردر. [۳] بروایتده موقن قلعه‌سیدر. بوقلعه‌لرک موقعلری تعیین اولمق لازمدر.